


宋詩紀事

八十五至八十七



|     |   |   |   |
|-----|---|---|---|
| 和書門 |   |   |   |
| 三   | 一 | 三 | 六 |
| 二   | 一 | 六 | 五 |
| 冊   | 架 | 函 | 號 |

|      |   |   |   |
|------|---|---|---|
| 內閣文庫 |   |   |   |
| 三    | 三 | 三 | 漢 |
| 六    | 三 | 九 | 書 |
| 三    | 一 | 六 |   |
| 二    | 一 | 五 | 類 |
| 冊    | 架 | 函 |   |

|      |         |      |
|------|---------|------|
| 內閣文庫 |         |      |
| 番號   | 漢       | 3965 |
| 冊數   | 32 (29) |      |
| 函號   | 363     | 123  |

廿九



宋詩紀事卷八十五

宗室






錢唐厲天鶚緝

海寧許承祖勘定

令時

令時字德麟太祖次子燕王德昭元孫元祐中簽  
書潁州公事坐與蘇軾交通罰金入黨籍紹興初  
襲封安定郡王同知行在大宗正事薨贈開府儀  
同三司有侯鯖錄

王直方詩話東坡作秋陽賦云趙王之孫有賢公子宅于不土之里而詠  
無言之詩蓋時字也坡云且殺人別處使不得  
錦繡萬花谷趙天且謀派妻祖下德字惟字從字世字令字子字伯字師  
字希字與字孟字由字太宗下元字允字宗字仲字士字不字善字汝字  
崇字必字良字友字魏王廷美下德字承字克字叔字之字公字彥字夫  
字時字若字嗣字次字



同官李仲益贈張思仲家歌人團茶子題其封  
色映宮妹粉香傳漢殿春團團明月魄卻贈月中人

次教授陳復常韻

坎壤中年坐廢人老來貂鼎視埃塵鐵霜帶面唯憂國機  
穽當前不爲身發廩已康諸縣命蠲逋一洗幾年貧歸來  
又掃寬民奏慙媿毫端爾許春

初到長安

來往長安未定居暫將僧舍當吾廬空中說法憑鈴語枕  
上朝飢聽木魚因果分明休問佛行藏自信罷占書眼前  
一物真堪羨百尺長楊水滿渠以上侯鯖錄

跋太白醉草六言

雖自九天分派不與萬李同林步處雷驚電繞空餘翰墨  
窺尋

春渚紀聞云此德麟跋遺所藏其實自謂也

冬日居山

亂山深處過巖凝僻靜門鄰物外僧送客踏穿松徑雪煮  
茶敲破石池冰朝垂簾幙寒慵卷夜鎖樓臺靜嬾登只待  
春來歸上國杖藜吟出白雲層詩林萬選

句

我識之無常縮舌君能競病且低顏和劉景文 侯鯖錄

令 鑠

令鑠字伯堅太祖五世孫第進士官至太僕

子瞻和予致齋詩有端向甕閒尋吏部老來唯欲醉  
為鄉之句因送薄酒兼成斐章冀發笑也

古人醉以酒蓋亦有所寓一飲百憂忘陶陶朝復暮公欲  
醉為鄉甕閒尋吏部惜取青銅錢濁醪安足酤敢竊好事  
名聊資子雲具巧手斧鼻端此情知有素

子瞻辭免起居之命令鑠復用前韻一首以勉之  
登州與儀曹到官如旅寓螭陛鳳凰池翺翺未云暮冰雪  
照人清黃色盈中部譬如千日釀一宿陋清醕載筆無多  
時公真濟時具歎息賀德基猶知我尸素

鐵網珊瑚鮮于伯機游高亭山廣嚴院記云院僧出東坡趙令鑠唱和真  
迹王明清題云英宗潛龍日居穆清宅與宗屬淄恭憲王游從最厚慶歷  
八年戊子兩家各生子同年月日時其後英宗入繼大統所誕即神宗既  
即天位以是日為同天節恭憲所有乃太僕伯堅也為本朝登進士第之

冠易文階最先子孫蕃衍世科相望聲華焜耀以至于今五行之說其可  
不信哉僧云伯堅子孫今居臨平貧不能自振此卷近年以粟易之

令 衿

令衿太祖五世孫號超然居士官左朝散大夫主  
管台州崇道觀

李伯紀丞相挽詩

道大終為累功高反被疑恨無長日月寶此大著龜鼓咽  
空山暮風酸落木悲弔喪哀不及賴有哭公詩

梁溪集附

子 覺

子覺字彥先號雪齋太祖六世孫令衿之子為嚴  
倅時放翁為郡守誠齋以詩寄放翁有幕中何幸  
有詩人之句謂子覺也有雪齋集

負暄野錄近世言墨法蓋推吾鄉雪齋趙彥先子覺彥先乃故安定郡王  
趙然居士令衿表之之子也其墨法本無師承但自少時篤好製造招延  
良工參合眾技遂造其妙中興三廟咸見貴重名播遐邇  
墨史宗室趙令衿善製墨子子覺孫伯康皆傳其膠法銘曰趙然清芬如  
在

書懷

柳影槐陰綠遶廳日長細得話詩情迎風紫燕忽雙去隔  
雨黃鸝又一聲筆墨生涯成冷淡筍蔬盤饌易經營世間  
微利真刀蜜有底驅馳取重輕

瀛奎律髓

子櫟

子櫟字夢授太祖六世孫元祐六年進士紹興中  
至寶文閣直學士卒

句

夜棋三百子曉髮一千梳 髮爲干戈白心于社稷丹

編

雞助

伯琳

伯琳太祖七世孫官右選

句

爲嫌陶令醉來伴屈原醒

趙與毓娛書堂詩話子曾伯祖伯琳官至右選平生喜爲詩五月菊句云  
云人所傳誦

伯晟

伯晟太祖七世孫淳熙中上元令

游攝山棲霞寺

棲霞境界何清壯嶽立五峯如列障三徵不復見高人千

刻尚能瞻寶相摩空老木韻秋聲雲屋天巖滿意行夜闌  
風定月將午門外呦呦聞鹿聲

景定建康志

師 霁

師霁字從善太祖八世孫伯驥子舉進士累遷司  
農卿知臨安府進兵部尚書與祠卒自號無著居  
士又號東牆

瓊花

香得坤靈秀氣全藥珠團外蝶翩翩親曾后土祠前看不  
是人閒聚八仙

全芳備祖

師 俠

師俠號坦菴太祖八世孫

梅花

南山如佳人迴立不可親而況得道者其閒梅子真

全芳備祖

師 恕

師恕太祖八世孫

月巖

睠此巖壑勝領客共登臨危棧臨不測巖途歷嶽嶽俯仰  
極高低上下窮幽深來登空明山千崖正沈沈下瞰青羅  
江古木鬱蕭森清風萬里來層雲盪孤襟有客可共賦有  
酒可自斟此景豈易得此樂豈易尋吾生今老矣遁迹歸  
窮岑一權下瀟湘此別意難任別後無相忘詩成寄郵音

粵西詩載

師秀

師秀字紫芝號靈秀永嘉人太祖八世孫紹熙庚戌進士浮沈州縣改秩而卒有天樂堂集清苑齋集四靈之四

詩人王尉天樂冷泉夜坐詩云樓鐘晴更響池水夜如深後改更為聽改如為觀病起詩云朝客偶知承送藥野僧相保為持經後改承作親改為作密二聯改此四字精神頓異真如光弼入子儀軍矣

靈隱寺

衆境碧沈沈前峯月正臨樓鐘晴聽響池水夜觀深清淨非人世虛無見佛心卻尋來處宿風起古松林

絕句

數日秋風欺病夫盡吹黃葉下庭蕪林疎放得遙山出又被雲遮一半無

姑蘇臺作

何人可與話登臨徙倚危闌日向沈千古蒼茫青史夢一年迢遞故鄉心天無雨雪梅花早地有波濤雁影深為是夫差舊臺榭愁來不敢越人吟

絕句

黃梅時節家家雨青草池塘處處蛙約客不來過夜半閑敲棋子落燈花

柳溪詩話意雖腐而語新

薛師石瓜廬

不作封侯念悠然遠世紛唯應種瓜日猶被讀書分野未  
多於地春山半是雲吾生嫌已老學圃不如君

巖居僧

開扉坐石層終日少人登一鳥過寒木幾花搖翠藤茗煎  
冰下水香炷佛前燈吾亦逃名者何因似此僧

孤山寒食

三月芳菲在水邊旅人消困亦隨緣晴舒蝶羽初勻粉雨  
壓楊花未放綿有句自題閑處壁無錢難買貴時船最憐  
隱者高眠地日日春風是管弦

雁山寶冠寺

行向石闌立清寒不可云流來橋下水疑是洞中雲欲住

逢年盡因吟過夜分蕩陰無絕頂一雁不曾聞

呈蔣肖韓薛師石

中夜清寒入緼袍一杯山茗當香醪禽翻竹葉霜初下人  
立梅花月正高無欲自然心似水有營何止事如毛春來  
擬約蕭閑伴同上天台看海濤以上清苑齋集

句

柘空淮鹵白梅近楚秧青

送謝耘游淮

娛書堂詩話

希逢

希逢太祖九世孫

九日舟中

倦客逢萸節生涯寄葉舟窮途危不顧飛權去難畱舊菊



重陽日寒蘆兩岸秋多情唯破帽猶戀老人頭後村千家詩

希淦

希淦號定山太祖九世孫

半山寺有感

一水波澄接御溝近城宮柳弄春柔烏衣巷裏人何在白鷺洲前水自流千古風流歌舞地六朝興廢帝王州今番不負看山約他日重來說舊游詩林萬選

希櫛

希櫛字誼父汴人太祖九世孫有抱拙小橐

江湖偉觀

華屋巋然占上方一樽同此寄相羊江湖翻海暮天闊湖

水拍隄春草長莽莽越山凝紫翠搖搖蘇柳閒青黃歸鴻影裏闌干晚回首中州入渺茫

送李鶴田東游後還鄉

劒傍梅花鶴夢醒東游吟骨帶秋清台山路杳神仙迹楚國書來母子情半榻烟霞應有約一筇風雪且兼程丁寧及早催行李莫待西湖草色平

過臨平

市井蕭條景物非居人猶號永和隄春山十里斜陽樹漠漠殘紅杜宇啼以上抱拙小橐

臨平記宋理宗紹定三年冬十月築永和塘捍臨平湖許應和有記

希邁

希邁字端行號西里永嘉人太祖九世孫有西里

詩橐

酬陳校書見寄

日長松院靜孤坐對殘編雨久波平岸山高燒接天春醒  
茶可解酒病藥難痊獨喜君親政南中客共傳

前賢小集拾遺

琴泉精舍寄友

客來僧已去古屋靜蕭蕭敲石引松火對花懸酒瓢窗櫺  
寒背日柱礎潤通潮君月過幽寂水程終隔橋

王生山水歌

范寬山頭李成樹百年二老皆仙去如今尺素留人間縱  
有千金無博處後人筆底工一家聲價隨可喧中華王君

二妙聚一手參以吟思游天涯萬里江山纔數幅東抹西  
塗意先足蒼梢巨石相參差風雨烟雲在羈束近時目賤  
耳反真畫圖重舊不重新名家翰墨未必貴塵漬贗本翻  
爲真君提健筆來海外山若玉簪江若帶朝昏變態焉可  
窮筆未鋪張心已會嶺南游者多詩人見君作畫應憐君  
求我新詩寫君畫終使李范聲名分

以上東甌詩集

希

彭一作澎

希彭字清中號十洲太祖九世孫四明人寶慶二  
年進士

隨隱漫錄趙君入仕四十年虛靜恬淡寂寞無爲除南雄守不赴後別親  
友理家事端坐而逝遺偈云六十二年皮袋放下了無罣礙青天明月一  
輪萬古逍遙自在

絕句

手執黃庭上石臺竹陰掃月徧蒼苔欲從此處卽仙去玉  
立清風待鶴來

隨隱漫錄

希混

希混太祖九世孫

岑公洞

自有烟雲護石扉更闌曉色近清暉岳前老檜吟風處似  
請仙翁化鶴歸

名勝志夔州岑公洞在大江之南廣六十餘丈深四十餘丈石崑盤結若  
華蓋左右方池有泉涌出當簷遇盛夏注水如簾真神仙窟也圖經云岑  
公名道願江陵人隋末避地隱此百餘歲肌膚若冰雪積二十年尸解去  
至唐宋閒加以神妙大師虛鑿真人之號唐刺史馬君詩南溪有仙淵咫  
尺非人間冷冷松下風日暮空蒼山趙希混有詩

與  
檟

與檟太祖十世孫

題白鶴崑

六丁開兩壁不知始何年中閒一空洞可張幾客筵我來  
拂石坐傾耳聽潺湲古榕蔽天罅飛瀑穿峽懸四時宿雨  
露亭午斂虹烟昔人避山寇飲潘枕苔眠興懷內訂日鼎  
鼎百餘年

名勝志福寧縣西南白鶴崑石磴峻峭盤空而上海上諸山皆入延眺嶺  
之南飛泉百丈遙下如銀河倒瀉是名南山滌宋趙與檟有詩

與  
崑

與崑字中父號菊坡秀安僖王四世孫居湖州寶  
祐初知平江府孟頫其子也

宿半塘寺

夜宿半塘寺惟聞塔上鈴老僧行道影童子誦經聲竹密  
風猶勁窗幽月愈明瓦爐香斷處一榻灑然清

吳興藝文補

與憲

與憲字德淵號節齋太祖十世孫居湖州嘉定十  
三年進士理宗朝歷官吏部尚書兼知臨安府終  
淮浙發運使知平江府致仕

太湖

倦客滄浪意扁舟汗漫游雲歸林屋晚木落洞庭秋此地  
真堪老中原恨未休可知侯萬戶不似橘千頭

金芳備祖

與杼

與杼號見山太祖十世孫

游大滌

九鎖闕仙關長歌入翠巒青松飛羽蓋脩竹動琅玕雪霽  
千巖瘦雲深六洞寒客來塵慮息一笑倚闌干

洞霄詩集

與滂

與滂字肖范號蔗境四明人太祖十世孫淳祐中  
為閩安鎮官

登浙江樓

兩岸共明月闌干霄漢閒風波浙江水砥柱海門山晝夜  
潮消長利名人往還不如沙上鷺玉立一身閑

花院

拆了千秋院宇空無人楊柳自春風薔薇性野難拘束卻  
過鄰家屋上紅以上詩林萬選

牽牛花

西風樵子谷藤蔓絡柴關名在星河上花開曉露閒秋空  
同碧色曉日轉紅顏若挂青松頂翛然不可攀全芳備祖

與東

與東字賓賜嚴陵人太祖十世孫宗學上舍寶祐  
丙辰進士歷任贛州教兩浙運幹會子庫檢察司  
農寺排岸班改奉議有魯齋小橐

方萬里序君詩瘦而不枯勁而不燥如趙章泉評君詩以爲唐唯有一孟東野宋唯有一陳無已然後知君之志慕貞曜後山之爲人甘于陋窮靜退而無求者也

次韻方萬里雨夜雪意

芋火房陰處翛然類嬾殘雨欺梅影瘦風助竹聲寒擁袂  
衣全薄哦詩字欲安兒童疑有雪頻起穴窗看

次韻方萬里寒甚送酒

連日寒殊甚衰年無一能硯呵磨墨凍瓶曬插花冰浮世  
無根絮餘生有髮僧蘇門如可卽端合事孫登以上瀛奎律髓

孟堅

孟堅字子固號彝齋太祖十一世孫其先以安定  
郡王從高宗南渡家于嘉禾之廣陳寶慶二年進  
士歷官朝散大夫嚴州守景定初遷翰林學士宋  
亡不仕

齊東野語子固襟度蕭爽有六朝諸賢風氣時比之米南宮而子固亦自以爲不歉也酷嗜法書多藏三代以來金石名迹東西薄游必挾所有以自隨一舟橫陳僅雷一席爲偃息之地隨意左右取之撫摩吟諷至忘寢食所至識不識望之知爲米家書畫船也偶客輦下會葛蒲節余偕一時好事者邀子固各攜所藏買舟湖上相與評賞飲酣子固脫帽以酒晞髮箕踞歌離騷旁若無人薄莫入西冷掠孤山樓榭茂樹閒指林麓最幽處瞪目絕叫曰此真洪谷子董北苑得意筆也鄰舟數十皆驚駭絕歎以爲真謫仙人

姚桐壽樂郊私語子固入本朝不樂仕進隱居州之廣陳鎮時載一小舟泊蓼汀葦岸看夕陽賦曉月爲事縣令宣城梅澥到船訪公公飛擢而去梅曰昔人所謂名可聞而身不可見始謂先生歟公從弟子昂自茗中來訪公閉門不納未人勸之始令從後門入坐定第問弁山笠澤近來佳否子昂云佳公曰弟奈山澤佳何子昂退使人濯其坐具

里中康節菴畫墨梅求詩因述本末以示之

逃禪祖花光得其韻度之清麗閑菴紹逃禪得其蕭散之  
布置回視玉面而鼠鬚已見工夫較精緻枝枝例作鹿角  
曲生意由來端若爾所傳正統諒末節舍此的傳皆僞耳

僧定花工枝則鹿夢良意到工則未女中卻有鮑夫人能  
守師繩不輕墜可憐聞名不識面云有江西畢公濟季衡  
麤醜惡拙祖弊到雪篷觴濫矣所恨二王無臣法多少東  
鄰擬西子是中有趣豈不傳要以眼力求其旨踢鬚止七  
萼則三點眼名椒梢鼠尾枝分三疊墨濃澹花有正背多  
般藥夫君固已悟筌蹄重說偈言吾亦贊誰家屏障得君  
畫更以吾詩跋其底

康不領此詩又有許梅谷者仍求又賦長律

濃寫花枝淡寫梢鱗皺老榦墨微焦筆分三踢攢成辦珠  
暈一圓工點椒糝綴峰鬚凝笑靨穩拖鼠尾施長條盡吹  
心側風初急猶把枝埋雪半銷松竹襯時明掩映水波浮

處見飄飄黃昏時候朦朧月深淺谿山長短橋關裏相挨  
如有意靜中背立見無聊筆端的樂明非畫軸上縱橫不  
是描頓覺坐來春盎盎因思行過雨瀟瀟從頭總是楊湯  
法拚下工夫豈一朝

王翠巖寫竹求詩亦與

古畫畫物無定形隨物賦形皆迫真其次師述有師繩如  
印印泥隨前人尚疑屋下重作屋參以新意意乃足晉魏  
而來幾百年義獻斷弦誰解續何況高東李杜編江湖競  
買新詩讀願君種取渭川一千畝飽飯逍遙步捫腹風晴  
烟雨盡入君心曾吐出毫端自森肅員大夫來子章何碌  
碌

竹墨蘭圖仍賦

六月衡湘暑氣蒸幽香一噴冰人清曾將移入浙西種一  
歲纔花一兩莖

自題水仙圖

自欣分得櫛山邑地近錢清易買花堆案文書雖鞅掌簪  
餅金玉且奢華酒邊已愛香風度燭下猶憐舞影斜簪弟  
梅兄來次第攬春熱鬧令君家

以上鐵網珊瑚

法忍寺門夜泊

秋泊禪扉夜清吟入興頻風生水鱗甲雲放月精神小夢  
迷香樹新涼透葛巾舊題尋不見吹徧壁間塵

栢上遺詩

孟淳

孟淳字子真號竹所又號虛閑野叟子固之弟

題高房山夜山圖二首

月底江山如畫好樓中几席與秋清  
剡藤不到高人手一段風流可得成

江行山立月盤桓有客無言樓上看清興  
肯隨城漏盡夜深風露恐高寒

鐵網珊瑚

士揆

士揆字才孺太宗五世孫官直祕閣

登天清閣

夕陽低盡已西紅百尺樓高萬里風  
白髮年年何處得只應多在倚闌中

墨莊漫錄

不敏

不敏太宗六世孫官保義郎

寄蘇盼奴

事載蘇小娟詩

當時名妓鎮東吳不好黃金只好書  
借問錢塘蘇小小風流還似大蘇無

武林紀事

不謫

不謫字師厚太宗六世孫慶元中昭武假守

句

信史賒青筋封章室阜囊

揮塵餘話跋王仲言學問該博遂初尤丈欲收實史館不果仲言又嘗剗切上封事不謫因不自揆以拙句殿諸公後云云

善應



善應字彥遠太宗七世孫汝愚父寓居崇德州錢市

題寧師西閣

飄泊南來幾歲寒追談往事漫心酸雲烟暮隔中原望歸折梅花忍淚看

次韻李長卿

一別芳洲不計年舊時攀折柳依然故人似欲撩詩興贛折梅花向酒邊

至元嘉禾志

善贛

善贛太宗七世孫

題岑公洞

真人邈何之恍忽不可見洞居獨嵌空壁留明珠濺藤蘿含冥濛竹柏鬪蔥蒨至幽合人心遠翠落江面野老乘籃輿使君肆清燕日影砌下倒雲容坐閒變大木巖欲傾邃壑路微轉崢嶸施屏風點綴成彩綉雖云急行樂勝賞殆亦徧欲歸重盤旋拂石看古篆

名勝志

善堅

善堅字德固袁州人太宗七世孫乾道二年進士判婺州官至戶部尚書

化成巖

低帽白蕉衫跨馬北巖路爲我撤炎歊時有清風度杖策躡游屐捫蘿窮幽趣怪石鳴瘦筇狹徑窘危步雲閒啓深

洞玲瓏天巧露僧居羅上下鐘聲蒼長暮長嘯排翠靄圍  
碁驚振鷺陶寫屏絲竹恐爲風景汗拂蘚題蒼崖縱橫醉  
中句茲游豈易得載酒莫辭屢

江西通志

善沛

善沛字濟世太宗七世孫淳熙二年進士終南康  
守

對雪

兒笑真珠滿盤碎女疑荷葉雨中來道人心下無些事三  
箇柴頭品字煨

名勝志

善倫

善倫字季思太宗七世孫

多景樓

壯觀東南二百州景於多處更多愁江流千古英雄淚山  
掩諸公富貴羞北府如今唯有酒中原在望忍登樓西風  
戰艦今何在且辦年年使客舟

梅圃詩話全篇警拔江湖閒多稱之或以爲劉改之詩誤矣

善扛

善扛字文鼎號解林居士太宗七世孫

春詞

碧落初明月未收露華香滴杏梢頭玉闌干外東風輭人  
在重雲第幾樓

詩家鼎鑪

善訥

善訥號復齋太宗七世孫

游大滌

黃簾有影金燈暗碧殿無人玉磬清我亦三生羽衣客夢  
魂久已到瑤京

洞霄詩集

善璪

善璪太宗七世孫家南海

餞陳市峯之廉泉

桃源渺何處夢短到家難不辦一止費猶爲九品官鶴嫌  
新俸薄鷗訝舊盟寒附翼攀鱗事書生不敢干

四朝詩

汝愚

汝愚字子直太宗子漢恭憲王元佐七世孫居饒

州之餘干縣擢進士第一光宗朝累除同知樞密  
院事寧宗朝權參知政事拜光祿大夫右丞相爲  
韓侂胄所忌責授寧遠軍節度副使永州安置至  
衡州暴薨後贈太師追封沂國公諡忠定配享寧  
宗廟庭

送注尚書

大猷

歸鄞

尚書天官貴持經侍幃幄青冥欲無際白首非故約連檣  
動南浦父老望巖壑下車入里門執手問歡樂十年幾風  
雨寒雞叫屋角勤勞畢吾分帝賚出寵渥殊適奉香火禁  
直連六閣遂令宣室思從今問晦朔

寧波府志

同林擇之姚宏甫游鼓山

在閩縣

幾年奔走厭塵埃此日登臨亦快哉江月不隨流水去天  
風直送海濤來故人契闊情何厚禪客飄零事已灰堪歎  
人生祇如此虛闌獨倚更徘徊

鼓山志

致爽軒

濃陰夾道水流渠吹盡殘花不復餘唯有范家三畝竹青  
青依舊色侵書

全蜀藝文志

汝談

汝談字履常號南塘太宗八世孫居餘杭淳熙十  
一年進士累官至西外宗正理宗時歷給事中權  
刑部尚書卒諡文懿

後村詩話本朝全盛時宗室貴顯而負詩名者有德麟近歲有南塘兄弟  
詩工而命窮者有紫芝仲白而南塘遂爲一代騷人之宗

環錦亭

臨安俞氏園

與子鄉鄰信有年故王遺事到今傳爽鳩邑改風烟在散  
騎園分水竹偏高架插書供夜讀滿堂戲綵敵春妍相如  
可是區區者戲筆題詩亦偶然

咸淳臨安志

翠蛟亭和鞏栗齋韻

幽亭枕蒼峽雲竇通曲水百折如建瓴灑灑鳴不止客來  
一抽鑰白霧噴巖底儵翕千丈蛟擎空翠濤起天開混沌  
竅日洗盤古髓諒匪畜池鱗多應化雷尾馮陵氣易壯怖  
蕩辭難侈術假金洞光景逾瑤臺泚誰云游方外巧異緇  
塵裏坡仙頗年數觀面猶尺咫采句貴自然鞏言良是已  
珍題豁靈界篆出蕃君里物生亦倚數有形必有靡道人

亦多事浮念何時死余生嗜泉藪痼疾牽硯几太息動靜  
機于何寄真理醉倒和滄浪煩君更詳此 洞霄詩集

汝誦

汝誦太宗八世孫居餘杭慶元五年進士

題翠蛟亭

百丈寒蛟下翠庭幽人相對覺風生闌干小倚飛觴處一

曲松風亂雨聲 洞霄詩集

汝鏖

汝鏖字明翁袁州人太宗八世孫嘉泰二年進士

曾官漕帥有野谷詩集

劉後村跋云明翁詩兼衆體而又徧行吳越百粵之地眼力益高筆力益  
放卷中歌行跌宕頓挫刺蛟縛虎手也及敏爲五七言詩又妥帖麗密若

唐人鍛鍊之作

小水寺

披霧入野寺寒林響西風誰遣僧出迎山鳥爲我通染衣  
松露香照眼巖花紅聊此息塵慮歸騎毋怱怱

訪隱者不遇

兩腋乘西風送我上高岑竹根一泉通石徑萬木森中有  
隱者居敗屋莓苔侵山空人不見雲滿挂壁琴兩鶴出候  
我逢迎啄衣襟應酬久頗厭走避不可尋誰伴山下去明  
月升高林

去婦詞

入得良人門自誓終此身掃室擁箕帚進盥躬盤巾采桑

宋詩紀事卷八十五  
趨壠首薦蘋潔湖濱十年盡婦道唯恐堂上嗔上和下睦  
本無事一旦小姑恣蕪菲浸潤既深貝錦成不棄不出譖  
不已良人繼絀心自知父母之命安敢違舉頭天邊指缺  
月暫缺須有團圓時君不聞章臺長條依舊垂樂昌半鏡  
還復歸

舟中

繫纜停征權斜陽古渡頭風霜先遠客天地獨扁舟水鳥  
衝開浪汀鴻占斷秋在家貧亦好何用出林丘

送彥東還湘

湘南多爽處羨子片帆還秋影清涵水烟痕淡著山蘭風  
香楚佩竹淚冷湘斑見說謔茅地江頭只數間

劉簿約游廖園

名園新整頓尊酒約追隨春晚花飛少牆高蝶度遲注湯  
童煖酒拍案客爭碁寂寞秋千索無人盡日垂

舟中

離家俄十日千里獨衰翁篷響過雲雨帆開逆水風新沙  
增岸腳小港隱蘆叢客思難消遣黃昏月一弓

題合江亭

石鼓山頭一小亭乾坤萬里眼雙明雖因刺史能尋勝不  
遇昌黎豈得名衡嶽雲開天洗碧蒸江湘合水爭清書巖  
莫辨當時事空積塵泥野草生

自注昌黎題合江亭寄刺史鄒君詩末  
有願書巖石上勿使塵泥澆之句

懷亨父

兩年隻影瀟湘去料想塵埃白髮侵久雨千山秋得意西  
風一雁客關心或于夢裏陪談笑每向人前問信音憶昔  
賡詩巖桂下花開今日歎孤斟以上野谷集

汝湜

汝湜號澹軒太宗八世孫居餘杭嘉定元年進士

敬和陳南渠先生九鎖步虛詞

并引按九鎖爲天關藏雲飛鸞地真龍陰洞微雲玆朝元凌

虛今存二首

竊聞天乘陽德而九爲老陽故仙道宗陽而取數皆九  
內景含氣以九爲節金丹大還九轉爲寶其在于人爰  
有九宮上應列宿是爲九曜圍則九重豈非陽數之極  
而仙真所居者乎天柱洞天外環九鎖神造靈設仰模

璇霄此固五帝真游列仙窟宅之地也山秀水清鈞綿  
奇絕飛舉之士疇昔接踵而我曾外祖寢虛先生即陳雷良

實以童年傳道洞微隱迹吳山修鍊內丹心樂此地時  
與高人幽士徜徉往來浴冷泉而白雲生寢石牀而丹  
氣炳靈異之迹不可具述故舅氏南渠居士猶鍾清風  
守一高蹈暇日因卽九鎖聲之步虛用標靈境以告來  
者汝湜辛酉仲秋因獲陪侍杖屨撫松拂石卽景長吟  
輒爾和韻用汚清唱之末寄之各山用識于他日也

天關鎖

雲壙高嵯峨七蕤銜銅環有象非有質真儔得躋攀九天  
著通籍保我玉鍊顏英英青旄節悠悠款靈關

宋詩紀事卷八十五  
三  
龍吟鎖

矯首東方宮變化何由尋神用妙難擬颺電赫森森雨施  
不爲功雲從本無心人寰謾懷想戛鉢希雷吟

題洞霄

洞府日月閑風景自清楚九關啓天鑰容我朝帝所清緣  
宿仙館夢破石泉雨明朝得羊珠試向張華語

以上洞霄詩集

汝讜

汝讜字蹈中號嬾菴汝談之弟以祖蔭補承務郎  
登嘉定元年進士累遷司農丞知溫州

題會春苑

草荒故苑幾春風尚想花開春樹紅欲問當時馬王事寂

寥殘照野亭中

後村詩話

翠蛟亭和鞏豐韻

衆峯抱蒼龍蟠屈翠蛟水放之兩崖閒奔洶不得止濤瀾  
生席上雷電轉石底恍疑天柱搖將拔陰洞起蘇公雄氣  
壓詩骨得仙髓指麾驅鯢鯨赫變動其尾紛紛下土人蟻  
垤自封侈驟觀目精眩筆墜汗流泚坐令空谷嘯聲徹霄  
漢裏君來松根吟仙者相去思老蛟破鎖去餘怒猶未已  
決開澗千丈散作霧五里今年溪湖乾草莽生意靡寸泉  
落山苗靈鑰起垂死遺吾雲子飯報汝青玉几野人尋泉  
竇筒壞方復理泓然山巔池冬夏常若此

洞霄詩集

汝回



汝回字幾道永嘉人太宗八世孫嘉定七年進士  
終主管進奏院

凌霄花

嫋嫋枯藤淺淺葩  
萸緣直上照殘霞  
老僧不作因依想  
將謂青松自有花

全芳備祖

杜子野爾別

有朋不貴數道合意自親  
早知離別難會覲豈厭頻  
青燈書閣下細語交情真  
酌此武陽泉饌彼松江鱗  
兵庖復有攜得非知我貧  
如何不我醉明日隔征塵

宿羅溪山

鷺嶺東游霽景微  
碧桃花外一鷺飛  
樵夫不斫垂潭樹  
知

有僧人挂浴衣

以上東甌詩集

句

春風過後雪初白  
夜雨晴時水亦香

橘花

屈原一點沈湘

恨李白三生捉月身

水仙 東甌詩集

汝 迕

汝迕字叔午一作叔魯號寒泉樂清人太宗八世

孫

括溪倚舟

樹古半成槎  
溪過歷歷斜  
寒林欲無路  
小塢不多家  
去客背流水  
停舟見暮鴉  
朝朝省秋水  
頻減一痕沙

四聖觀納涼

琳宮暑自薄短簟逸人眠樹繫來時馬風移聽處蟬藥童  
清入畫道士默如禪忽憶山中雪瘦梅逋老阡

哭趙蹈中

族老今為海內憐清名多是布衣傳一封表乞從師郡千  
里神寒覓句年水鏡照人前日政雨絲吹旒別時船離家  
憶值梅初白梅未成陰失此賢以上前賢小集拾遺

汝旗

汝旗太宗八世孫

宿山隱齋

平生悅山隱一室容我借弄泉掬明月坐石延清話既調  
松下琴復作松風瀉仙人擣藥禽獨叫青山夜洞霄詩集

汝鑿

汝鑿太宗八世孫

金陵作

龍虎帝王宅鳳凰仙子臺六朝遺事冷八月夜潮回隴雁  
秋仍到江花晚自開憑高一尊酒何代獨無才景定建康志

汝棗

汝棗太宗八世孫居鄞寶慶二年進士史彌遠之  
壻

鶴林寺

仙去當年尋舊迹傳來此日尚名山茶開花落朝昏事唯  
有春風歲歲閑鶴林寺志

汝 鋌

汝鋌太宗八世孫

雪

病倦扶危坐起看天雨花蹇驢東野句破屋玉川家勇羨  
穿籬犬飢憐噪樹鴉龍山雲壑勝冰柱憶劉叉

後村千家詩

汝 鏞

汝鏞太宗八世孫

浯溪中興頌

蒼崖插浯溪清漲溼元頌費墨今屋高千年此安用鯨翻  
天寶末雲滃朔方衆還都迎上皇嗚咽抱餘痛兩宮重宴  
樂萬國盡朝貢當時紀成功小雅見微諷顏公發勁畫金

玉相錯綜我于碑刻閒衆羽得孤鳳艱危人物難忠烈鬼

神重摹取挂野堂英風凜生凍

浯溪集

汝 唵

汝唵字仁山號兩山太宗八世孫官臨安令

離越

東關寒水深游子別家心權急波鳴枕篷疎月在衾半生  
多道路何日定山林隔岸聞漁唱離騷不敢吟

詩林萬選

棲真洞

幅巾灑松露雙袖抖衣塵可耐人閒暑來尋洞裏春座分  
雲骨冷屐隱絃紋新鶴近清尊舞如畱欲去賓

杭州府志

崇 滋

崇滋字澤民號竹所永嘉人太宗九世孫嘉定十年進士

悼步月

雁過妝樓人不見斷腸又是一黃昏不知天上嬋娟影能照人間寂寞魂響屨廊深空認步唾茸窗燠尙畱痕合將一把香酥骨葬在巫陽雲雨村

詩家鼎鑪

客舍

巷深人寂靜蚤守客牀鳴半夜後風雨一燈前弟兄愁來無好夢吟到有新聲不信看雙鬢蕭蕭白幾莖

求酒趙評事

半老情懷睡不能小簷霜月當寒燈無人來問相如渴敲

碎梅花一夜冰

以上東顧詩集

崇嶠

崇嶠字漢宗南豐人太宗九世孫嘉定十六年進士官至大宗丞有白雲橐

閨怨

恨殺庭前鵲難憑卜遠期朝朝來報喜誤妾畫雙眉

後村千家詩

宮詞

小苑風酣雨露香紅情綠意爲春忙五雲獨遶瓊花夢三十六宮清漏長

詩林萬選

遊金精山

飛泉灑靈雨玉田闕青芝中有神仙人宛然姑射姿天巧

從古今虛寶開烟扉歲深語亦誕目極神爲馳我亦泉石  
人夙昔夢見之登臨悟三生毛髮何森縱未脫區中緣玉  
顏畏磷緇仙春醉青桃蘿風吹輕絲凡事俱爾爾居然駭  
癡兒畱詩遺仙靈詎解山中疑

金精風月

凭遠亭

在淳安縣後

莎亭日日報平安幽處依然絕往還平野四圍天一幅有  
人踏雪看南山

嚴州府志

崇齋

崇齋永嘉人太宗九世孫嘉定進士

過楊子橋

一抹輕烟隔小橋新篁褪籜籜兩三梢惜春不覺歸來晚花

壓重門帶月敲

東甌詩集

崇錡

崇錡字元冶開封人太宗九世孫有鷗渚微吟

尋真夕對

春雲弄月黃金絲春山草木皆仙姿松根對坐日西夕羣  
峯當前列青壁鏗鏗虛壑含古音靜聽宛是商山吟洞石  
微開月當戶剪水弦冰心手語

野園

野園對客無杯酌共坐茅簷理釣車片月漸低風露冷隔  
牆山鬼嘯梨花

仙思

水殿風清急景斜  
靈君初下五雲車  
碧羅寶扇雙題字  
記是誰人詠落花

都昌卽事

世事可無酒  
春藤還有花  
山雲欲到地  
街鼓又催衙  
風緊魚休市  
官貧飯帶沙  
天機不得問  
暮色欲棲鴉

湖中

汀蒲獵獵起涼颺  
碧蕩香中獨立時  
機事兩忘吾喪我  
扁舟吟過水仙祠

以上鷗渚微吟

崇 皦

崇皦太宗九世孫嘗宰南安

九日山送客次趙循州韻

蒼松藏野寺山以隱  
君靈俯仰千年事  
孤高九日亭抗顏  
頭漸白弔古眼猶青  
有客耽幽討吟情起  
鶴汀

南安縣志

崇 森

崇森太宗九世孫

春暖

春晴多得兩三日  
便覺暄于輕暑天  
行客停鞭爭買扇  
侍兒啟筍請收綿  
把杯早自嫌溫酒  
盃手相將喜冷泉  
此去西湖已初夏  
安排絺綌上湖船

後村千家詩

崇 纘

崇纘太宗九世孫居餘杭紹定五年進士

游九峯

九峯元不鎖俗駕自來稀水石藏仙窟烟霞護羽衣夜後  
窺月叫曉鶴出松飛擬結巢由伴眠雲隱翠微

洞霄詩集

必璩

必璩字玉淵號秋曉太宗十世孫家東莞登咸淳  
元年進士任南康縣丞文丞相開府于惠州璩攝  
惠州軍事判官入元隱溫塘村有覆瓿集

避地惠陽鼓峯用徐心遠韻

收拾當年破敕黃山中蕙帳夢魂香風供松葉暖茶竈雲  
臥茅窗凍筆牀一雨鳴蛙亂深夜數聲啼鳥怨斜陽風塵  
浩蕩愁如海那得中山醉酒方

覆瓿集

必范

必范號古一太宗十世孫桐江人月泉吟社第二  
十名自署學古翁

前題

一歲農功只在春夫夫婦幾艱辛青門舊有種瓜地綠  
野新添躬稼人早把牛衣教諸子欲修蠶具問良辰夜來  
谷口東風過只恐逢人問子真

評云此卷八詩一起一結中六篇分詠三春節序曲盡山園開景態如元  
日云卜歲聊憑六壬課有生未識五辛盤元夕云幸有漁樵同此樂苦無  
車馬自相道社日云幾點飛花芳徑雨一雙新燕荻簾風清明云茭白生  
苗藏蛤地桑黃含榘浴鷺天皆佳句也今全錄其首篇  
月泉吟社學古翁回詩賞劄云效休文之八詠知類農歌放毛遂于眾中  
允高匠矧矧謝池僅止五字而魯語尤戒多爲首而錄全思則過半恭惟  
執事雙桐政美五柳門深續雅道于一綫之餘亦言其典尋吟盟于千里  
之外夫豈無人乃采艱辛之辭特置次癸之列月泉分覲雲壑懷慙某夢  
斷釣天心游樂地視元穎可爲至寶奚有于今裁白苧而製深衣于焉學  
古

必拆

必拆杭人太宗十世孫白雲社月泉吟社第三十  
各自署愛雲仙友

前題

一段佳山水芳時事正

一作事

妍犢耕青燒雨鶴臥碧桃烟

社老邀嘗煮鄰僧伴摘鮮莫嫌陶令拙農圃得餘年

評缺

月泉吟社愛雲仙友回詩賞剡云田園歸隱夙欽彭澤之高風筆硯久荒  
難得石湖之秀句不慙鄙劣爾爾擬駭誤辱茲收敢言奔殿敬惟執事山  
林富貴軒冕鏘銖鈞月耕雲詎輸製錦傍花隨柳雅稱調琴可見知幾之  
老成居然遠世而肥遯適憑佳興用拂清人餌絲泉釣江湖貨元穎寶珠  
璧此意古矣其利溥哉某溝壑餘生泥塗下士有懷農圃靡就犁鋤茲效  
顰唐士之五言恰轅足周南之一轂僅逃孫外免媿盧前自謂狂吟思復  
青羶而遠矣或云駝初會歌白苧以邀之

必種

必種東嘉人太宗十世孫

題梅山

一隱吳門訪北山深憐漢鼎尚多艱片言儻得回天聽未  
必仙名滿世閒

梅仙事實

必漣

必漣字仲連崇安人太宗十世孫有倚梅吟橐

濯足

小橋坐濯足澗狹水流急源頭夜雨多落花漾紅溼

崇安縣志

鱣之

鱣之字子雍魏王廷美五世孫少學于陳無已有

句法



春日

拂牀敲枕晝初長好夢驚回燕語忙深竹有花人不見直  
應風轉得幽香

墨莊漫錄

句

風生閭闔春來早月到蓬萊夜未中

大觀初代府尹宋喬年上元應制者舊續聞

公碩

公碩浚儀人魏王六世孫餘杭令

慶元四年五月再游洞霄宮

舊時曾此覓仙緣一別于今四十年白髮重來嗟老矣青  
山九鎖故依然肩輿直入松閒路洗耳還聽湖底泉幽興  
未闌吟未就半峯斜日下平川

洞霄詩集

彥端

彥端字德莊魏王廷美七世孫乾道淳熙閒以直

寶文閣知建寧府終左司郎官有介菴集

壽皇太子

九月四日

日日龍樓問寢時雞人未動漏聲遲前星一點朝天帝只  
有清臺太史知

子晉吹笙未是仙阿丕橫槩少全篇小吟青著梅梢句一  
日東風四海傳

大安宮裏漆園椿子榦孫枝葉葉新今日四株高下碧相  
承一樣八千春

光堯初御六龍天上直維參大火躔天意分明昌宋德誕

辰三世總丁年

西湖志餘淳熙中孝宗及皇太子朝上皇于德壽宮周益公詩云一丁扶火德三合肇皇基蓋高宗生于大觀丁亥孝宗生于建炎丁未光宗生于紹興丁卯故也陰陽家以亥卯未為三合

壽張守

堂堂天上張公子龍劍分光自斗牛海上忽歸槎萬里雲  
閒未放月中秋才為漢殿無雙手恩到閩中第一州亦有  
人言識仙骨不知何日是封畱 以上聖宋名臣獻壽集

壽皇孫

前星炳煥領孫星環拱中天日兩輪四葉重光同聖世千  
秋佳節近生辰本支秀茂且復且典學熙明新又新喜入  
威顏天一笑壽觴分賜一枝春 合璧事類前集

崇安道中

風柳疎無力秋花冷不香客情隨去燕涼思起唳蟻地入  
閩山隘天連越樹長年年擣衣石為爾感征裳 詩林薦選

玉真臺

在德興縣治後彥端為今時作

春色無窮巷農鄉有太和病嗟聞道晚貧喜得閑多徑草  
供徐步鄰花護屢過層臺宜抗榭誰為買烟波 饒州府志

彥假

彥假字顯父魏王七世孫居閩慶元二年進士

翠蛟亭和鞏栗齋韻

天下名洞天有山必有水餘杭山水窟神仙所棲止仙人  
乘雲去玉蛟畱潭底至今雷雨夕蛟睡時驚起爪劈巖石

裂石罅滴乳髓涓涓泉流出半垂白鳳尾風來琴筑響月  
照纓絡侈曲折納深池徹底清且泚築亭當澗衝木石相  
表裏翠壁潤含烟層峯去天咫尺道人幻出奇指顧猶未已  
忽驅蛟走鬪瞬息八百里怒氣挾奔霆草木爲披靡兒童  
驚震掉面若槁灰死達人本大觀談笑自隱几須臾羣動  
息靜坐窮物理水石本無心相激一至此

洞霄詩集

箴夫

箴夫字仲禮居鄞魏王八世孫觀文殿學士彥逾  
子紹熙四年進士寶慶初直祕閣爲湖南憲

題化成巖

塵世有仙境清絕不可言寒江露沙迹曉嶂埋雲根暇日

推吏案呵道穿僧門來飲巖下水何必攜芳尊

袁州府志

立夫

立夫字德成樂清人魏王八世孫開禧元年進士  
官至刑部尚書

臘日偶書

近日斗侵寅南天雪不成梅梢動生意禽鳥弄春聲鬢逐  
年華換身資藥力輕聽傳吳蜀事對酒不能傾

東甌詩集

潛夫

潛夫字景壽號鶴所黃巖人魏王八世孫嘉定十  
六年進士寶慶初監澈浦鎮稅

弦風亭

怪他蟹舍蠓房地不是吟情佳亦難數尺短牆圍晝寂半  
鉤疎箔障春寒水生草滿蛙鳴合日薄花陰鶴夢安底處  
青衫病司馬浩歌東望取琴彈

敬水志

庚夫

庚夫字仲白寓居興化軍魏王八世孫舉進士不  
第以宗子取應得右選趙紫芝爲晚唐詩名冠四  
靈而仲白亞紫芝劉後村擇百篇爲山中集并誌  
其墓

劉後村跋仲白于古體爲其高遠于大篇發其精博于短章窮其要妙

歲除卽事

連夜縫紉辦今朝杵臼頻買花簪穉女送米贖窮鄰宦薄

唯名在年華與鬢新桃符詩句好恐動往來人

瀛奎律髓

讀曾茶山詩集

茶山八十二癯仙千首新詩手自編吟到瘴烟因避寇貴  
登從橐只棲禪新于月出初三夜淡比湯煎第一泉咄咄  
逼人門弟子劔南已見祖燈傳

梅圃詩話紹興末曾茶山下居子越得禹迹寺東偏空舍十許間居之手  
種竹盈庭日讀書賦詩其中公平生清約不營尺寸之產所至寓僧舍蕭  
然不蔽風雨公詩有曰手自栽培千箇竹身常枕藉一牀書蓋寓居時所  
賦也公年雖高吟詠猶不輟前用趙仲白讀公詩集有詩云蓋山陰陸  
務觀實從公學詩陸有劔南集行于世故末句及之

落魄

落魄蕉衫戴道冠萬蒲滿案浸清寒有錢卽買丹砂鍊無  
病猶將素問看連日游山僧共住頻年乞米鶴同滄世閒

不朽非鍾鼎曾與高人靜處觀 詩家鼎鑪

句

鶴殘籬外筍鼠舐墨中膠 稍得 詩句日從窗眼寫墨丸夜入

枕頭收 寄僧 貴耳集

密夫

密夫號竹溪魏王八世孫晉江人紹定二年進士

三脫麪

筍蕈初萌杞藥纖然松自煮供親嚴聞人食肉何曾鄙自  
是山林滋味甜 山家清供

瓊夫

瓊夫號巖雲魏王八世孫

寄林可山

好春虛度三之一滿架茶蘼取次開有客相看無可設數  
枝帶雨摘將來 山家清供

時伐

時伐魏王九世孫

種蘭

深林瘦徑傲朝昏牙髮消疎氣骨存九畹誰移炎海角半  
庭新補冷雲痕圃翁認葉非漳種墨客知花是楚魂從此  
國香春不斷光風滿地長兒孫 後村千家詩

時璿

時璿魏王九世孫丹陽令

題陳少陽先生上書稟後

虜騎昔長驅高屋建瓴水權姦誤國家和議甘飢餓遂令  
九廟尊冒沒在棘枳帶甲百餘萬一嘯自披靡堂堂諫議  
公屹若頽波砥叩關斥時宰不惜用一死此死不足道聞  
者自興起一木支大厦于時不可爾使早定大計何物摩  
口壘可憐紹興閒賻贈官其子我得覩遺稟感慨寧已矣  
千載凜如生作者書于紙

盡忠錄附

時儋

時儋號竹所魏王九世孫

西禪餞董溪翁

西浦風寒水自流迢迢行李又歸休今宵古寺吟邊酒明

日長江客裏舟溪路梅花催雪興旗亭竹色伴雲愁還家  
更爲明時出莫向漁磯老釣鈎

詩林萬選

時煥

時煥字元晦晉江人魏王九世孫嘉定十二年進  
士官廣東運判

九日山送客

頻來因送客攜酒訪仙靈歸去成何事重來媿此亭天寬  
野水白松潤石崖青倚杖思今古寒鷗落遠汀

南安縣志

若櫬

若櫬字自木號霽山崇安人魏王十世孫咸淳十  
年進士

武夷茶

石乳霑餘潤雲根石髓流玉甌浮動處神入洞天游

高元濬  
茶乘

卽事

雲散春山出人閑白晝長禽聲谷空樹影晝斜陽種果  
期秋實澆花趁晚涼行藏天已定隨分且徜徉

遇樵川林時中

建水樵川隔幾重相逢孰意大江東客行芳草垂楊外春  
在柔桑小麥中細雨疏田流水碧殘霞擁樹遠林紅浮生  
聚散渾無定有酒何妨一笑同


暮春

香透蜂房蛭夢殘一簾新雨又春闌柳腰瘦得難禁舞今

夜東風莫更寒

以上崇安縣志

錢 傲  
謝 文 德 興 德 成 蕭 王 德 孫 文 德 子 元 德 子 大 宗  
切 進 日 等 廢 忠 遷 王 德 立 之 德 德 元 年 受 大 下 云  
馬 大 元 師 太 平 興 國 三 年 帝 以 長 明 節 是 節 節 節  
封 許 王 德 王 德 進 封 侯 王 德 忠 德 行 節 節  
百 竹 於 皮 本 集



武侯  
石乳  
散存山中人  
閉戶書長卷  
餘詩  
秋夜  
流花  
起晚涼  
石藏天已定  
雲分且宿  
遊杜川  
林時中  
姓水  
樵川  
隔幾重  
相逢  
孰意  
大江  
東客  
行  
春  
外  
春  
世  
未  
系  
小  
夢  
中  
細  
雨  
疏  
田  
流  
水  
聲  
幾  
度  
傳  
鐘  
聲  
浮  
生  
來  
散  
運  
無  
定  
有  
酒  
何  
妨  
一  
笑  
同  
暮  
春  
東  
風  
莫  
更  
寒  
以上崇安縣志

宋詩紀事卷八十六

降王

錢唐 厲鶚 緝  
錢唐 周京 勘定

錢俶

俶字文德吳越武肅王鏐孫文穆王元瓘子大將  
胡進思等廢忠遜王傑立之建隆元年授天下兵  
馬大元帥太平興國三年詔俶來朝納土歸京師  
封許王徙封鄧王薨追封秦國王諡忠懿有詩數  
百首號政本集

宮中作

廊廡周遭翠幙遮  
禁林深處絕喧譁  
界開日影憐窗紙  
穿



破苔痕惡筍芽西第晚宜供露茗小池寒欲結冰花謝公  
未是深沈量猶把輸贏局上誇

汝帖

李煜

煜字重光初名從嘉南唐元宗李璟第六子諸兄  
早亡以次爲嗣在僞位十有五年歸宋封違命侯  
授左千牛衛上將軍太宗登極改封隴西公太平  
興國三年薨追封吳王以王禮葬洛京之北邙山  
有集

五朝故事李後主時建康市中染肆之旁多題曰天水碧尋而皇家蕩平  
之悉前兆也天水碧因煜之內人染碧夕露于中庭爲露所染其色特好  
遂名之

石林燕語太祖嘗因曲宴使煜誦其得意詩遂舉扇揖讓月在手動搖  
風滿懷以對太祖曰好一箇翰林學士  
西清詩話藝祖言李煜若以作詩工夫治國事豈爲吾虜也

送鄧王二十弟牧宣城

且維輕舸更遲遲別酒重傾惜解攜浩浪侵愁光蕩漾亂  
山凝恨色高低君馳檣檝情何極我凭闌干日向西咫尺  
烟江幾多地不須懷抱重淒淒

馬令南唐書王名從益出鎮宣州後主率近臣餞綺霞閣賦詩自爲序其  
畧云秋山滴翠暮壑澄空愛公此行暢乎遐覽

漁父詞

浪花有意千里雪桃花無言一隊春一壺酒一竿鱗世上  
如儂有幾人

一棹春風一葉舟一輪繭縷一輕鉤花滿渚酒滿甌萬頃  
波中得自由

古今詩話

悼周后

又見桐花發舊枝一樓烟雨暮淒淒凭欄惆悵人誰會不  
覺潸然淚眼低

層城無復見嬌姿佳節纏哀不自持空有當年舊烟月芙  
蓉池上哭蛾眉

嘗與周后移植梅花于瑤光殿之西及花時而后已  
殂因成詩見意

殷勤移植地曲檻小欄邊共約重芳日還憂不盛妍阻風  
開步障乘月漑寒泉誰料花前後蛾眉卻不全

失卻烟花主東君自不知清香更何用猶發去年枝

書靈筵手巾

浮生苦憔悴壯歲失嬋娟汗手遺香漬痕眉染黛烟

書琵琶背

侁自肩如削難勝數縷條天香畱鳳尾餘煖在檀槽

馬令南唐書後主昭惠后周氏大司徒宗之女甫十九歲歸于王宮通書  
史善音律尤工琵琶元宗賞其藝取所御琵琶時謂之燒槽者賜焉後主  
卽位册爲國后後主嘗演念家山破后復作邀醉舞恨來遲新破皆行于  
時季子仲宣后尤鍾愛忽暴疾卒后病遂亟以元宗所賜琵琶及嘗臂玉  
環親遺後主沐浴正妝自內含玉殂于瑤光殿之西室享年二十九後主  
哀苦骨立杖而後起每于花朝月夕無不傷懷觸物寓意多爲詩云云

悼幼子瑞保

永念難消釋孤懷痛自嗟雨深秋寂寞愁引病增加咽絕  
風前思昏朦眼上花空王應念我窮子正迷家

馬令南唐書宣城公仲宣後主子也小字瑞保三歲讀孝經若成誦然聞  
奏樂輒審音調宮中燕侍頗合禮度出見士大夫改容顧揖如成人禮乾  
德二年卒年四歲始封宣城公追贈岐王謚懷獻時昭惠病劇後主恐重  
傷其意默坐飲泣因爲詩以寫志吟詠數四左右爲之泣下

宣城公挽辭

珠碎眼前珍花凋世外春未銷心裏恨又失掌中身玉筍  
猶殘藥香奩已染塵前哀將後感無淚可霑巾  
豔質同芳樹浮危道畧同正悲春落實又苦雨傷叢穠麗  
今何在飄零事已空沈沈無問處千載謝東風

馬令南唐書昭惠先病聞仲宣死哀苦增劇遂至于殂故後主并其母子悼之

### 歸宋渡江作

江南江北舊家鄉三十年來夢一場吳苑宮闈今冷落廣  
陵臺殿已荒涼雲籠遠岫愁千片雨打歸舟淚萬行兄弟  
四人三百口不堪閑坐細思量

### 病中感懷

憔悴年來甚蕭條益自傷風威侵病骨雨氣咽愁腸夜鼎

唯煎藥朝髭半染霜前緣竟何似誰與問空王

以上馬令南唐書

唐音戊籤云煜少聰慧善屬文性好聚書宮中圖籍充物鍾王墨跡尤多  
置澄心堂于內苑延引文士居其間酷尚浮屠法時請沙門講論著雜說  
百篇時人以爲可繼典論兼善書畫又妙于音律云  
海錄碎事曰映仙雲薄秋高天碧深李後主句  
瀛奎律髓冷笑秦皇經遠略靜憐姬浦苦時巡李後主詩也

### 詠柳書黃羅扇賜慶奴

風情漸老見春羞到處銷魂感舊游多謝長條似相識強  
垂烟態拂人頭

邵博聞見後錄南唐李侯撮襟書宮人慶奴扇云云  
蓉塘詩話茶所雜錄云此後主歸命後所作

### 病中書事

病身堅固道情深宴坐清香思自任月照靜居唯擣藥門  
扃幽院只來禽庸醫懶聽詞何取小婢將行力未禁頰向

空門知氣味不然煩惱萬塗侵

方虛谷云李後主號能詩詞集中多有病詩憔悴衰颯似貧士大夫宜其亡也

秋鶯

殘鶯何事不知秋橫過幽林尚獨游老舌百般傾耳聽深黃一點入烟流棲遲背世同悲魯瀏亮如笙碎在緱莫更畱連好歸去露華凄冷蓼花愁

以上唐音戊籤

題金樓子後

并序

梁孝元謂王仲宣昔在荊州著書數十篇荊州壞盡焚其書今在者一篇知名之士咸重之見虎一毛不知其斑後西魏破江陵帝亦盡焚其書曰文武之道今夜盡矣何荊州壞焚書二語先後一轍也詩以慨之

牙籤萬軸裏紅綃王粲書同付火燒不是祖龍畱面目遺篇那得到今朝

楓窗小牘云此詩同書藏內庫今朝字誤作金朝徽厲惡而抹之後竟如識入金

句

鶯狂應有恨蝶舞已無多

老學菴筆記後主作此未幾亡國

人生不滿百剛作千年豎

野客叢書

鬢從近日添新白菊是去年依舊黃

任淵陳后山詩注

李從善

從善字子師元宗第七子封韓王入宋改封楚國公

陸游南唐書韓王從善因留京師後主手疏求歸國太祖不許後主素友愛每憑高北望泣下霑襟由是歲時游燕多罷不講常製御登高文揮塵後錄王景彝故第在京師太子巷初開寶開江南李後主遣其弟從善入貢留不遣建宅以賜故都人猶以太子目之也

薔薇一首十八韻呈東海侍郎徐鉉

綠影覆幽池芳菲四月時管弦朝夕興組繡百千枝盛引  
牆看徧高頰架屢移露輕濡綵筆蠶誤拂吟髭日照玲瓏  
幔風搖翡翠帷早紅飄蘇地狂蔓挂蛛絲嫩刺牽衣細新  
條窈草垂晚香難暫捨嬌態自相窺深淺分前後榮華互  
盛衰尊前畱客久月下欲歸遲何處繁臨砌誰家密映籬  
絳羅房燦爛碧玉葉參差分得殷勤種開來遠近知晶熒  
歌袖袂柔弱舞腰支膏麝誰將比庭萱自合嗤勻妝低水  
鑑泣淚滴烟霏畫擬憑梁廣名還亞楚姬寄君十八韻思

拙媿新奇

全唐詩

李從謙

從謙元宗第九子後主母弟也風采峭整喜為律  
詩動有規誨封吉王宋改封鄂國公

觀碁

竹林二君子盡日竟沈吟相對終無語爭先各有心恃強  
斯有失守分固無侵若算機籌處滄滄海未深

馬令南唐書後主燕閑與侍臣奕從謙時數歲侍側命賦觀碁詩云歎賞久之

孟昶

昶字保元後蜀高祖第三子嗣偽位三十二年宋  
師破成都納降歸于汴京封開府儀同三司檢校

太師兼中書令秦國公乾德三年薨冊贈尚書令  
追封楚王諡恭孝

避暑摩訶池上作

冰肌玉骨清無汗  
水殿風來暗香滿  
簾開明月獨出人  
敲枕釵橫雲鬢亂  
起來瓊戶寂無聲  
時見疎星渡河漢  
屈指西風幾時來  
不道流年暗中換

漫叟詩話錢唐有一老尼能誦後主詩云云

東坡洞仙歌序云僕七歲見眉州老尼姓宋忘其名自言嘗隨其師入蜀主孟昶宮中一日大熱蜀主與花藥夫人夜起避暑摩訶池上作此詞具能記之

句

新年納餘慶  
嘉節號長春

蜀構祝蜀未亡前一年歲除日和令學士幸黃遜題桃符版于寢門以其詞非工昶命筆自題云云蜀平朝廷以呂餘慶知成都長春乃太祖誕聖

節名也其符合如此

錢唐 厲 鷄 緝

平湖 陸 騰 勘 定

楊 朴 妻

送 夫 赴 官

宋詩紀事卷八十七

閨媛

錢唐 厲 鶚 緝

平湖 陸 騰 勘定

楊朴妻

送夫赴召

更休落魄耽杯酒且莫猖狂愛詠詩今日捉將官裏去者  
回斷送老頭皮

東坡志林真宗東封還訪天下隱者得杞人楊朴能為詩名對白言不能  
上問臨行有人作送詩卿否朴曰惟臣妻有一首云云上大笑放還山命  
其子一官就養

蔣 桃

蔣桃寇萊公妾

呈寇公

一曲清歌一束綾美人猶自意嫌輕不知織女螢窗下幾度拋梭織得成

風勁衣單手屢呵幽窗軋軋度寒梭臘天日短不盈尺何似妖姬一曲歌

侍兒小名錄拾遺萊公因會贈歌姬以束綾襦桃作詩呈公

劉元載妻

歷代吟譜孫冕三英集序云三英者三哲婦之詞也世有男子大誇篇詠而意隨語盡者滔滔皆然三英婦德天賦若此忍不序而殫之乎詩話總龜天聖中禮部尚書孫冕序三英集劉元載妻詹光茂妻趙晟之母早梅寄遠惜別三詩劉妻哀子無立詹妻留夫侍母病趙母懼子遠遊孫公愛其才以取之

早梅

南枝向暖北枝寒一種春風有兩般憑仗高樓莫吹笛大家畱取倚闌干

歷代吟譜

詹光茂妻

寄遠

錦江江上探春回銷盡寒冰落盡梅爭得兒夫似春色一年一度一歸來

歷代吟譜

趙晟母

惜別

暖有花枝冷有冰佳人後會卻無憑預愁離別苦相對挑盡漁陽一夜燈

歷代吟譜

謝希孟



希孟字母儀晉江人景山之妹嫁陳安國早卒

歐陽公序云希孟之詩尤隱約深厚守禮而不自放有古幽閑淑女之風非特婦人之能言也

詠芍藥

好是一時豔本無千歲期所以謔相贈載之在聲詩

句

為花雖可期論德亦終鮮牡丹句牽主人衣一步行不得薔薇

薰薰麝臍烈灼灼猩血殷樹既摧為薪花亦落為塵霄

豔陽一何好零落千載冤朱盜者得其便掉頭笑且歌曼陀

羅花卞子真賞莊生夢還怯蝴蝶花以上歷代吟詠

許氏

許氏虞部之女方勉妻

夫犯夜禁代呈郡守鄭毅夫

明時樂事娛詩酒帝里風光剩占春況是白衣重得侶不

堪青旆自招人早知玉漏催三鼓肩把金貂換百巡大抵

仁人憐氣類免教孤客作囚身詩話總龜

句

匣劍未磨晁錯血已聞刺客殺袁絲讀晁錯傳形管遺編

徐氏

徐氏侍從宥之女吳丞相妻

偶題

絮吹柳陌三春雨花落梨園一笛風百尺玉樓簾半捲夜

深人在水晶宮墨莊漫錄

錢氏

錢氏封南宮縣君

絕句

士悲秋色女懷春此語由來未是真儻若有情相眷戀四

時天氣總愁人

侯鯖錄

王氏

王氏名文淑荆公之妹張奎妻封長安縣君

鶚按墨莊漫錄

作荆公女適吳丞相之子封長安縣君誤今從隱居詩話改正  
隱居詩話張奎妻長安縣君荆公之妹也佳句為最其云草草杯盤供笑  
語昏昏燈火話平生荆公妻吳國夫人亦能文嘗有小詞約譙觀游西湖  
有云待得明年重把酒攜手那知無雨又無風脫灑可喜

戲詠白羅繫髻

香羅如雪縷新裁惹住烏雲不放回還似遠山秋水際夜

來吹散一枝梅

墨莊漫錄

李氏

李氏建昌人公擇之姊江西洪亶郎中妻封文城

縣君

挽兄公擇尚書

久歷金門貴未酬黃屋知如聞天祿客抱恨作銘詩

皇朝類苑

王氏

王氏荆公女吳安持妻封蓬萊縣君

李壁王荆文公詩注介父二女長適吳安持實文閣待制次適蔡下

寄父

西風不入小窗紗秋意應憐我憶家極目江山千萬恨依

然和淚看黃花

冷齋夜話

李樛大夫妻

文獻通考李樛有毛詩詳解三十六卷陳氏曰樛閩之名儒于林少穎為外兄

謝魏國范夫人

朝來瑞靄徧祥虛果見麻姑降陋居陶令滿籬唯有菊相

庭錄  
如四壁但藏書蕭條庭館門羅雀冷落杯盤食欠魚缺後二句過

王氏

王氏平甫女劉天保妻

李句

不緣燕子穿簾幕春去秋來那得知

隱居詩話

李珣

珣字溫叔都官員外郎某之幼女八歲能詩適王

常汎舟江湖溺死

榴花

烈火真紅輕皺面晨霞碎翦貼枝條金刀刺出猩猩血濺

落芳叢久不銷

翰府名談

魏夫人

魏夫人襄陽人道輔之姊曾子宣丞相之妻

句

使君自為君恩厚不是區區愛華山

老學菴筆記曾子宣丞相元豐間帥慶州名還往來潼關夫人魏氏作詩戲之云

女郎曹希蘊

贈乾明寺繡尼集句

睡起楊花滿繡牀為他人作嫁衣裳因過竹院逢僧話始  
覺空門氣味長

楊公彥餘筆錄

新月

禁鼓初聞第一敲乍看新月出林梢誰家寶鏡新磨出匣  
小參差蓋不交

桐江詩話女郎曹希蘊詩都下有人以敲梢交為韻索賦新月詩曹賦  
云云摹多遜之句也

句

記得小軒岑寂夜月移疎影上東牆

漫叟詩詩希蘊詩雖格韻不高時有巧語嘗作墨竹詩云云此語最工

賀方回姝

寄賀方回

獨倚危闌淚滿襟小園春色嬾追尋深恩縱似丁香結難  
展芭蕉一寸心

能改齋漫錄方回眷一姝別久姝寄詩云云賀因所寄詩成柳色黃詞云  
薄雨催寒斜照弄晴春意空闌長亭柳色纔黃遠客一枝先折烟橫水際  
映帶幾點歸鴉東風消盡龍沙雪還記出門時恰而今時節將發畫樓芳  
酒紅淚清歌頓成輕別已是經年杳杳音塵都絕欲知方寸共有幾許清  
愁芭蕉不展丁香結枉望斷天涯兩厭厭風月

丁渥妻

寄外

淚溼香羅帕臨風不冝乾欲憑西去雁寄與薄情看

雲齋廣錄進士丁渥在太學夢歸家見妻子燈下披箋握管為書寄生  
曰我已至矣何用書為妻但揮涕而不荅又于別幅見詩云云生既覺以

宋詩紀事卷八十一  
語同舍客客曰君思念之極以至于此後旬日得書并詩皆夢中所見無少差矣

并門徐帥屬內子

句

幕中舞客呈鸚鵡帳下牙兵困蒺藜

和韻幕中有醉起舞者

華袞自宜

還舊物繡衣先見冠同寮

和韻送屬官除監司故相家也

耆舊續聞并門徐帥屬內子能詩林子中為帥每首唱徐密寫歸衆方操觚內子詩已來必有可觀

陳氏

陳氏述古女適李氏

題小雁屏

紅蓼淡蘆敲曲水幾雙容與對西風扁舟阻向江鄉去卻

喜相逢一枕中

曲屏誰畫小瀟湘雁落秋風蓼半黃雲淡雨疎孤嶼遠冷  
冷清夢到高唐

耆舊續聞陳述古女適李氏從夫仕晉寧軍判官部使者以小雁屏求詩自作黃魯直小楷題其上云

謝氏

謝氏王元甫妻

送外

此去唯宜早早還休教重起望夫山君看湘水祠前竹不  
是男兒淚染斑

青瑣高議

高氏

高氏淮南士大夫妻

暮春感懷

楊花日日長無定  
海燕年年卻有歸  
一瞬青春疾如電  
等閑著盡縷金衣

歷代吟譜

盧氏

句

田舍輓轡出短牆  
村落鞦韆挂高樹

寒食 歷代吟譜

葉桂女

桂女字月流

琵琶亭

樂天當日最多情  
淚滴青衫酒重傾  
明月滿船無處問  
不聞商女琵琶聲

中山詩話

李氏女

李氏女毘陵人

詠破錢

十六歲作

半輪殘月掩塵埃  
依稀猶有開元字  
想得清光未破時  
買盡人間不平事

墨客揮犀

鮑娘

題兌溪驛

谿驛舊名多烟光  
滿羣嵐須知今夜  
好宿處是江南

清波雜志 蘇衍信開驛名兌溪 明其水作三道來作多字形 鮑娘詩 蔣穎叔和之

暨氏女

暨氏女建安人

句

多情樵牧頻簪首無主蜂鶯任宿房

春渚紀聞建安暨氏女子十歲能詩賦野花云云觀者雖加驚賞而知其後不保貞素竟更數夫流落而終

王氏

王氏趙德麟妻

絕句

白藕作花風已秋不堪殘睡更回頭晚雲帶雨歸飛急去  
作西窗一夜愁

茗溪漁隱叢話此趙德麟細君作也德麟既繆居因見此篇遂與之為親余以為此二十八字媒也

張氏

張氏芸叟女司馬朴妻

句

莫訝淚頻滴都緣心未灰  
滿目烟含芳草綠倚闌露泣  
海棠紅

墨莊漫錄芸叟久經遷謫快快不平嘗內集分題賦詩其女得蠟燭有句云云浮休有慚色司馬朴之室芸叟女也鄭延路上寺中一聯云云或者便是詠燭者

王氏

王氏曹組之母兄弟幼孤王氏教養成就

雪中觀妓

梁王宴罷下瑤臺窄窄紅鞦步雪來恰是陽春三月暮楊  
花飛處牡丹開

桐江詩話

陳氏

陳氏蜀人唐暨妻

送張邦基母

念別每驚魂流年多病身惟我延陵子情真意更親分攜  
無淚盡望遠起愁新老眼將何暖音書不厭頻  
雪意亂江雲江梅漸放春雁歸人去後愁與歲華新榮路  
君方振園居我豈貧惟餘憂我念相憶莫霑巾

墨莊漫錄唐暨潛亨質肅公猶子余母之舅也隱居襄陽著周公政典以  
周官定臧否鄒志完為序娶陳氏蜀人令德純茂尤工文章大觀中先君  
為郡學官代還以詩送別余母云云

正氏

正氏朝奉郎正舜中女諸女皆能文詞每兄弟內  
集必聯詠為樂

寄外

簾裏孤燈覺曉遲獨眠畱得宿妝眉珊瑚枕上驚殘夢認  
得蕭郎馬過時西清詩話

周仲美

題郵亭壁

世居京師父游宦家于成都既而適李氏子侍舅姑宦  
泗上從良人赴金陵幕偶因事棄官入華山有長往之  
意仲美即寄身合肥外祖家方求歸未得會舅遽調任  
長沙不免共載而南雲水茫茫去國益遠形影相弔灑  
涕何言因書所懷于壁

愛妾不愛子為問此何理棄官更棄妻人情寧可已永訣  
泗之濱遺言空在耳三載無朝昏孤幃淚如洗婦人義從



夫一節誓生死江鄉感殘春腸斷晚烟起西望太華峯不知幾千里

王直方詩話

郭暉妻

荅外

碧紗窗下啟械封尺紙從頭徹尾空應是仙郎懷別恨憶人全在不言中

葉夢得崖下放言士人郭暉因寄妻問誤封一白紙去細君得之乃寄一絕云

秦少游女

句

眼前雖有還鄉路馬上曾無放我情

靖康間題壁 梅磻詩話

李清照

清照號易安居士濟南人格非之女趙挺之之子明誠妻其母王狀元拱辰女亦工文章清照晚節不終再適張汝舟流落江湖閒卒有漱玉集

朱子游藝論本朝婦人能文只有李易安與魏夫人李有詩大畧云兩漢本繼紹新室如贅疣所以稽中散至死薄殷周中散非湯武得國引之以比王莽如此等語豈女子所能  
茗溪漁隱叢語易安再適張汝舟未幾反目有啟事與綦處厚云猥以桑榆之晚景配茲駟儂之下材傳者無不笑之  
雲麓漫抄易安投翰林學士綦崇禮啟清照敬素習義方鹿明詩禮近因疾病欲至膏肓牛蟻不分灰釘已具嘗藥雖存弱弟應門惟有老兵既爾蒼皇因成造次信彼如簧之說惑茲似錦之言弟既可欺持官文書來輒信身幾欲死非玉鏡架亦安知僂俛難言優柔莫決呻吟未定強以同歸視聽才分實難共處猥以桑榆之晚景配茲駟儂之下才身既懷臭之可嫌惟求脫去彼素抱壁之將往決欲殺之遂肆侵凌日加毆擊可念劉伶之肋難勝石勒之拳局地扣天敢效談娘之善訴升堂入室素非李赤之甘心外援難求自陳何害豈期末事迺得上聞取自宸衷付之廷尉被桎梏而置對同凶醜以陳詞豈惟賈生羞絳灌為儕何啻老子與韓非同傳但祈脫死莫望償金友凶橫者十旬蓋非天降居囹圄者九日豈是人為抵雀捐金利當安往將頭碎壁失固可知實自繆愚分知獄市此蓋伏遇

內翰承旨摺紳望族冠蓋清流日下無雙人間第一奉天克復本緣陸贄  
之詞淮蔡底平實以會昌之詔哀憐無告雖未解驂感戴鴻恩如真出已  
故茲白首得免丹青清照敢不省過知慙捫心識愧責全責智已難逃萬  
世之譏敗德敗名何以見中朝之士雖南山之竹豈能窮多口之談惟智  
者之言可以止無根之謗高鵬尺鷃本異升沈火鼠冰蠶難同嗜好達者  
共惜童子皆知願賜品題與加湔洗誓當布衣蔬食溫故知新再見江山  
依舊一瓶一鉢重歸賦畝更須三沐三薰忝在葭莖敢茲塵瀆  
清波雜志頃見易安族人言明誠在建康日易安每值天大雪卽頂笠披  
蓑循城遠覽以尋詩得句必邀其夫廢和明誠每苦之也  
四六談塵唐人祭文多用四六雖韓退之亦然故李易安祭趙湖州文曰  
白日正中歎龐公之機捷堅城自墮憐杞婦之悲深婦人四六之工者  
琅嬛記李易安賀人學生啟中有云無午未二時之分有伯仲兩楷之侶  
旣繫臂而繫足實難弟而難兄玉刻雙璋錦挑對襟注曰任文二子學生  
德卿生于午道卿生于未張伯楷仲楷兄弟形狀無二白汲兄弟母不能  
辨以五絲繩一繫于臂一繫于足

上樞密韓公工部尚書胡公

并序

紹興癸丑五月兩公使金通兩宮也易安父祖出韓公  
門下見此大號令不能忘言作詩各一章以寄意以待

采詩者云

三年夏六月天子視朝久凝旒望南雲垂衣思北狩如聞  
帝若曰岳牧與羣后賢寧無半千運已過陽九勿勒燕然  
銘勿種金城柳豈無純孝臣識此霜露悲何必羹捨肉便  
可車載脂土地非所惜玉帛如塵泥誰當可將命幣厚辭  
益卑四岳僉曰俞臣下帝所知中朝第一人春官有昌黎  
身爲百夫特行足萬人師嘉祐與建中爲政有臯夔漢家  
畏王商唐室尊子儀是時已破膽將命公所宜公拜手稽  
首受命白玉墀曰臣敢辭難此亦何等時家人安足謀妻  
子不必辭願奉天地靈願奉宗廟威徑持紫泥詔直入黃  
龍城北人定稽顙侍子當來迎仁君方博信狂生休請纓

或取犬馬血與結天日盟  
胡公清德人所難謀同德協心志安脫衣已被漢恩煥離  
歌不道易水寒皇天久陰后土溼雨勢未回風勢急車聲  
麟麟馬蕭蕭壯士懦夫俱感泣閭閻嫠婦亦何知瀝血投  
書干記室葵正踐土非荒城勿輕談士棄儒生露布詞成  
馬猶倚峭函關出雞未鳴巧匠何曾棄樗櫟芻蕘之言或  
有益不乞隋珠與和璧只乞鄉關新信息靈光雖在應蕭  
條草中翁仲今何若遺氓豈尚種桑麻敗將如聞保城郭  
嫠家父祖生齊魯位下名高人比數當時稷下縱談時猶  
記人揮汗成雨子孫南渡今幾年漂零遂與流人伍欲將  
血淚寄山河去灑東山一坏土

雲麓漫抄

浯溪中興頌詩和張文潛

五十年功如電掃華清花柳咸陽草五坊供奉鬪雞兒酒  
肉堆中不知老胡兵忽自天上來逆胡亦是姦雄才勤政  
樓前走胡馬珠翠踏盡香塵埃何爲出戰輒披靡傳置荔  
枝多馬死堯功舜德本如天安用區區紀文字著碑銘德  
真陋哉迺令神鬼磨山崖子儀光弼不用猜天心悔禍人  
心開夏爲殷鑒當深戒簡策汗青今具在君不見當時張  
說最多機雖生已被姚崇賣  
君不見驚人廢興傳天寶中興碑上今生草不知負國有  
姦雄但說成功尊國老誰令妃子天上來號秦韓國皆天  
才苑桑羯鼓玉方響春風不敢生塵埃姓名誰復知安史

健兒猛將安眠死去天尺五抱囊峯峯頭鑿出開元字時  
移勢去真可哀姦人心醜深如崖西蜀萬里尚能反南內  
一閉何時開可憐孝德如天大反使將軍稱好在嗚呼奴  
輩乃不能道輔國用事張后尊乃能念春薺長安作斤賣  
清波雜志

曉夢

曉夢隨疎鐘飄然躡雲霞因緣安期生邂逅萼綠華秋風  
正無賴吹盡玉井花共看藕如船同食棗如瓜翩翩坐上  
客意妙語亦佳嘲辭鬪詭辨活火分新茶雖非助帝功其  
樂何莫涯人生能如此何必故歸家起來斂衣坐掩耳厭  
喧譁心知不可見念念猶咨嗟

感懷

寒窗敗几無書史公路可憐合至此青州從事孔方君終  
日紛紛喜生事作詩謝絕聊閉門燕寢凝香有佳思靜中  
我乃見至交烏有先生子虛子

春殘

春殘何事苦思鄉病裏梳頭眼最長梁燕語多終日在薺  
薇風細一簾香

以上彤管遺編

夜發嚴灘

巨艦只緣因利往扁舟亦是爲名來往來有媿先生德特  
地通宵過釣臺

釣臺集

句

詩情如夜鵲三繞未能安 少陵也自可憐人更待明年

試春草以上風月堂詩話南來尚怯吳江冷北狩應悲易水寒

南渡衣冠少王導北來消息欠劉琨建炎初作 以上詩話雋永

楊氏

楊氏越漁者楊翁女歸謝生

與謝生聯句

珠簾半牀月青竹滿林風楊何事今宵景無人解與同謝

宮闈詩史

陸放翁妾

題壁

玉階蟋蟀鬧清夜金井梧桐辭故枝一枕淒涼眠不得呼

燈起作感秋詩

隨隱漫錄陸放翁宿驛中見題壁詩詢之驛卒女也遂納為妾方餘半載夫人逐之妾賦卜算子云只知眉上愁不識愁來路窗外有芭蕉陣陣黃昏雨曉起理殘妝整頓教愁去不台畫春山依舊留愁住

文婉

文婉溫州樂清人錢氏婦

句

霜月天邊清興遠金鐘雲裏夢魂閑題白石山 詩女史

呂氏

呂氏伯恭之祖姑封清源君

句

前身當是陶淵明愛酒不入遠公社詩女史

韓玉父

題漠口鋪 并序

妾本秦人先大父嘗仕于朝因亂遂家錢唐幼時易安居士教以詩及笄父母以妻上舍林子建去年林得官歸閩妾傾囊以助其行林許秋冬閒遣騎迎妾久之杳然何其食言耶不免攜女奴自錢唐而之三山比至林已官盱江矣因而復回延平經由順昌假道昭武而去歎客旅之可厭笑人事之多乖因理髮漠口鋪漫題數語于壁云

南行踰萬山復入武陽路黎明與雞興理髮漠口鋪盱江在何所極目烟水暮生平良自珍羞爲浪子婦知君非秋

胡強顏且西去 彤管遺編

何師韞

師韞字季才金谿人抱甕先生天棐女嫁臨川饒氏四十而寡所居有嬾愚樹遂榜室曰嬾愚有詩集

自題嬾愚室

君不見南嶽嬾殘師佯狂啖殘食粥涕任垂頤嬾爲俗人拭又不見愚溪子柳子堂堂古遺直因以愚名溪于今慕其德二子真吾師欲見不可得唯有嬾愚樹終日對顏色齊威勤讀書輪扁巧斲輪勤巧動心志何如嬾愚真衰年髮已皤行少坐時多亦欲倣勤巧奈此嬾愚何 夷堅志

失假山偈

片石亡來歲月深昔時尋覓到而今元來只在家山裏枉費工夫別處尋

撫州府志何氏喜浮屠教徧閱華嚴諸經一日偕夫往白楊山作夫假山偈云云年四十孀居紹興開張魏公浚迎待母鎮國太夫人帥闔道出界山太夫人亦通禪學聞其名踵門一見契合呼為無生法友

汪氏

汪氏彥章女內江劉五清之配

寄良人

旅食京華歲月多聖賢事業竟如何明年佇聽泥金報閑把關睢獨自歌

四川總志

朱淑真

淑真號幽棲居士錢唐人世居桃村工詩嫁為市井民妻不得志歿宛陵魏仲恭輯其詩名曰斷腸集

傷春

覽鏡驚容卻自嫌逢春長是病厭厭吹花弄粉新來嬾惹恨供愁近日添生怕子規聲到耳苦羞雙燕語穿簾眉頭眼底無他事須信離情一味嚴

初夏

竹搖清影罩幽窗兩兩時禽噪夕陽謝卻海棠飛盡絮困人天氣日初長

秋夜

夜久無眠秋氣清  
燭花頻翦欲三更  
鋪牀涼滿梧桐月  
月在梧桐缺處明

馬塍

一塍芳草碧芊芊  
活水穿花暗護田  
蠶事正忙農事急  
不知春色爲誰妍

以上斷腸集

賦小鬟舞五絕

管弦催上錦茵時  
體態輕盈祗欲飛  
若使明皇當日見  
阿蠻無計誑楊妃

香茵穩襯半鉤月  
往來凌波雲影滅  
弦催拍緊促將徧  
兩袖翩然作回雪

柳腰不被春拘管  
鳳轉鸞回霞袖緩  
舞徹伊州力不禁  
筵

前撲簌花飛滿

占斷京華第一春  
清歌妙舞實超羣  
只愁到曉人星散  
化作巫山一段雲

燭花影裏粉姿閑  
一點愁侵兩點山  
不怕帶他飛燕妒  
無言逐拍省弓彎

西湖志餘與淑真同時有魏夫人亦能詩嘗置酒邀淑真命小鬟隊舞因索詩以飛雪滿羣山爲韻淑真醉中援筆賦五絕云云不惟詞旨豔麗而舞態之妙亦可想見也

劉彤

彤字文美江寧章文虎妻

寄外

碧紗窗外一聲蟬  
牽斷愁腸嬾晝眠  
千里才郎歸未得  
無



言空撥玉爐烟

茗溪漁隱叢話

陳氏

陳氏號梅莊提刑仲微女適新昌胡縣丞有詩集

述懷

一片愁心怯杜鵑  
嬾妝從任鬢雲偏  
怕郎說起陽關意  
常掩琵琶第四弦

山城落日弄昏黃  
又了平生半日忙  
侍妾不須燒絳蠟  
讓

他明月入回廊

名媛幾囊

黃淑

淑字致柔適建寧進士王防寡居後族議改適因

詠竹以見志

詠竹

勁直忠臣節孤高烈女心  
四時同一色霜雪不能侵

名媛幾囊

連倩女

倩女延平人適鄰生陳彥臣

題竹簾

綠筠劈破條條直  
紅線經回眼眼奇  
為愛如花成片段  
致

令直節有參差

名媛幾囊

華春娘

春娘適徐君亮

贈外

燕子樓中燕子飛  
芹泥一點誤  
霑衣主人頻起  
嗔嫌意垂

下珠簾不放歸

彤管新編

黃氏

黃氏適福建潘用中

感懷

闌干閑倚日偏長  
短笛無情苦斷腸  
安得身輕如燕子  
隨風容易到君傍

名媛瓊囊

謝慧卿

慧卿巴縣人有閨餘集

絕句

尋得桃源可學仙  
丹書唯恐鳳飛傳  
雨收峯頂雲歸洞  
風到池塘月滿天

四川總志

王瓊奴

瓊奴徐茗郎妻

荅外

茜色霞箋照面頰  
玉郎何事太多情  
風流不是無佳句  
兩字相思寫不成

名媛瓊囊

林杜娘

杜娘杭州新城人

遊碧沼勝居

幽谷泉聲冷鳥啼  
僧定深好花叢古  
砌寒瀑發高岑  
遊客陸鴻漸居人  
支道林欲歸青嶂  
去臨去復沈吟

彤管遺編

朱逸仙

寄元驤卿

郎今多病如家令妾自拚躬怨楚王斜壓玉釵成獨夢低  
垂元髮繫柔腸

四朝詩

金麗卿

麗卿杭州人

題廣信道中

家住錢唐山水圖梅邊柳外識林蘇平生慣占清涼國豈  
料人間有暑途

古杭雜記詩集

賈蓬萊

春曉

方池水影薄曲檻鳥聲嬌鸞鏡紅綿冷峨眉翠黛消冶容

舒嫩萼幽思結柔條纖指收花露輕將雪粉調

謝姊惠鞵

蓮瓣娟娟遠寄將繡羅猶帶指尖香弓彎著上無行處獨  
立花陰看雁行

以上彤管遺編

鄧氏

寄衣

欲寄寒衣上帝都連宵裁翦眼模糊可憐寬窄無人試淚  
逐西風灑去途

四朝詩

來氏

來氏豫章人

水仙花二首

瑤池來宴老仙家醉倒風流萼綠華白玉斷筓金暈頂幻  
成癡絕女兒花

花盟平日不曾寒六月曝根高處安待得秋殘親手種萬

姬圍繞雪中看全芳備祖

女郎張惠卿

題常山店壁

迢遞投前店颼颼守破窗一燈明復暗顧影不成雙清波雜志

毛友龍妻

寄外

翦燭親封錦字書擬憑歸雁寄天隅經年未報干秦策不  
識如今舌在無詩話總龜

沈清友

清友姑蘇女子

絕句

晚天移棹泊垂虹閑倚篷窗問釣翁為底鱸魚低價賣年  
來朝市怕秋風

隨隱漫錄清友一絕得風人之體又詠漁父起家紅蓼岸傳世綠蓑衣詠  
牧童自便牛背穩卻笑馬蹄忙得下字之工

于本大妻

本大故姓許旌陽族也得仙術又變姓名夫婦偕

隱西山下

得仙詩

醉舞狂歌踏落花綠羅裙帶有丹砂往來城市買山藥那

箇西山是我家

宮闈詩史

楊氏婦

楊氏婦永嘉人

送夫從軍

海壇門外浪滔天妾上城樓君上船回首西風深巷底梅

花霜月夜如年

東甌詩集

俞氏

俞氏號菊窗

賀陳隨隱以布衣除東宮掌書

萬人海裏關幽扉欲學深居只布衣不道內前車馬鬧又

催父子入宮闈

隨隱漫錄

宋氏

宋氏天台人

鬻廬

自歎年來刺骨貧吾廬今已屬西鄰殷勤說與東園柳他

日相逢是路人

趙葵行營雜錄天台宋氏家本富後貧鬻廬于鄰價成作詩云云富者見詩惻然即以券還之亦不索其直鄉人嘉其謹

趙葵姬

絕句

柝聲默報早朝回滿院春風繡戶開怪得無人理絲竹綠

陰深處摘青梅

古今女史趙葵同知樞密院朝罷歸私第而諸姬不見葵往訪之乃羣聚摘青梅有一姬善詩賦葵責令賦詩云云

韓希孟

希孟巴陵人魏公五世孫襄陽買尚書子瓊之婦

年十八開慶初元兵至岳陽為卒所掠赴水越三

日得其屍練翬帶中有詩日璐按練翬帶中詩宋史與輟耕錄不同今兩存之

練翬帶詩

我質本瑚璉宗廟供蘋蘩一朝嬰禍難失身戎馬閒寧當  
血刃死不作衽席完漢上有王猛江南無謝安長號赴洪

流激烈摧心肝宋史列女傳

又

宋未有天下堅正臣禮秉開國百戰功每陣惟雄整及侍

周幼主臣心常炯炯帝曰卿北伐山戎今有警死狗莫擊

尾此行當繫頸即日辭陛下盡敵心欲逞陳橋忽兵變不

得守箕穎禪讓法堯舜民物普安靜有國三百年仁義道

馳騁未改祖宗法天胡肆大眚細思天地理中有幸不幸

天果喪中原大似裂冠衽君誠不獨活臣實無魏丙失人

焉得人垂戒嘗耿耿江左無謝安塞北有王猛所以戎馬

來飛渡巴陵境大江限南北今此一舩艦本期固封疆誰

謂如畫餅烈火燎昆岡不辨金玉礦妾本良家子性僻守

孤梗嫁與尚書兒銜署紫蘭省直以才德合不棄宿癩癭

初結合歡帶誓比日月兩鴛鴦會雙飛比目願常並豈期

金石堅化作桑榆景旄頭熱正然蚩尤氣先屏不意風馬

牛復及此燕郢一方遭劫虜六族死俄頃退鷁落迅風孤

鸞弔空影簪堅折白玉瓶沈斷青綆一死空冥府憂心長  
炳炳意堅志不移改邑不改井我本瑚璉器安肯作溺皿  
志節匪轉石氣噎如吞鯁不敢燭火然願爲死灰冷貪生  
念麴蛾乞憐羞虎穿借此清江水葬我全首領皇天如有  
知定作血面請願魂化精衛填海使成嶺

輟耕錄

節婦王氏

王氏臨海人

題清風嶺崖石

君王無道妾當灾棄女拋男逐馬來夫面不知何日見此  
身料得幾時回兩行清淚偷頻滴一片愁眉鎖未開迴首  
故山看漸遠存亡兩字實哀哉

東園客談至元十三年丞相伯顏平宋以偏師徇台台之臨海民婦王氏者美姿容被掠于夫長殺其舅姑與夫而欲私之婦誓死不可自念且被汚因陽曰能俾我爲舅姑與夫服期月乃可事主君于夫長見其不難于死從所請仍使俘婦雜守之師還挈行至嶼過清風嶺婦仰天竊歎曰吾知所以死矣即齧拇指出血寫口占詩于崖石上寫畢投崖下以死死之日距今且將八九十年石上血墳起如始寫時不爲風雨所剝蝕亦謝端爲之立祠

盧氏

盧氏荆門州人統制吳源妻

送夫赴襄陽

羨君家世舊纓簪百戰常懷報主心草檄有才追記室築  
臺無路繼淮陰射鵬紫塞秋雲黑走馬黃河夜雪深白首  
丹衷知未變歸來雙肘印黃金

絕命詞

夫爲萋弘血妾感共姜詩夫妻同死義天地一妻其

荆門紀畧源救襄陽陣歿氏聞赴大慟部署家事畢焚香泣拜曰夫死王事忠也妾敢不相從于地下遂賦此詩自縊死

杜氏婦

北行作

江淮幼女別鄉間好似明妃遠嫁無默默一心歸故國區  
區千里逐狂夫慵拈簫管吹羌曲嬾繫羅裙舞鷓鴣多少  
眼前悲泣事不如花柳舊江都

山房隨筆

英州司寇女

以下無姓名闕媛

過梅嶺題

并序

妾幼年侍父任英州司寇既代歸父以大庾本號梅嶺  
今蕩然無一株遂市三十本植于嶺之左右因畱詩于

寺壁今隨夫任端溪復至此嶺已爲圯鏝者所覆卽命

墨于故處

滇江今日掌刑回上得梅山不見梅輟俸買栽三十樹清

香畱與雪中開

墨客揮犀

上庠士人妻

寄鞵鞮

細鞵官鞵巧樣新殷勤寄與讀書人好將穩步青雲上莫

向平康漫惹塵

名媛璣囊

太學生妻

寄夫

數日相望極須知意思迷夢魂不怕險飛過大江西



合璧事類前集有書生娶後遊太學久不歸一夕夢返其家見妻秉燭寫詩書生怪而記之後家書至有詩一首如夢中所見無殊夢之夕乃發書之日

浣花女

潭畔芙蓉

芙蓉花發滿江紅盡道芙蓉勝妾容昨日妾從隄上過如

何人不看芙蓉

顧氏積書巖選

無名女子

永安驛題柱

無人解妾心日夜長如醉妾不是瓊奴意與瓊奴會

名媛瓊囊

崖州女子

詠花扇

團扇畫方新金花照席茵那緣燈下見更值月中人

四朝詩

無名女子

靖康閒題鄧州南陽驛壁

流落南來自可嗟避人不敢御鉛華卻思當日鶯鶯事獨

立東風霧鬢斜

陶朱新錄

無名婦人

句

蚌胎光透殼犀角暈盈尖

詠月 許彥周詩話

鄱陽婦人

建炎初題黃連步接官亭壁

妾鄱陽人也女工之外從事詩禮不幸嚴霜下墜泰山

其顏飄泊一身所適非偶薰蕕同器情何以堪昨浮家  
洞庭怒張一帆良人倏爲鬼錄吁臣不事二主女不事  
二夫其奈何哉偶攜稚子來登客亭感時傷心遂成小  
絕知我者其天乎

故里蕭條一望閒此身飄泊歎空還感時有恨無人說愁  
斂雙蛾對暮山

景定建康志

宋詩紀事卷八十七

八十七

宋

宋

宋

宋

